

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XLI No. 13
Hulyo 7, 2010
www.philippinerevolution.net

Editoryal

Noynoy Aquino: Ang bag-o nga itsura sang kontra-rebolusyon

Si Benigno “Noynoy” Aquino III ang bag-ong itsura sang kontra-rebolusyon. Pormal na siya nga gin-
pwesto sang Hunyo 30 bilang bag-o nga puno sang papet nga reaksyunaryong gubyrno. Siya na subong ang pangunahon nga tagasakdag sang paghari sang imperyalismong US, kag lokal nga daku nga burgesyang kumprador, bu-rukrata kapitalista kag agalon nga mayduta.

Sa iya subong nakasalig ang mayor nga responsibilidad nga padayunon ang pagdumala sa garuk kag bangkrap nga malakolonyal kag malapyudal nga sistema, palig-unon, padalagnon ang estado sini, kag tapnaon ang anuman nga hangkat sa papet nga reaksyunaryong gahum.

Pareho sang ginalauman sa iya sang imperyalismong US kag mga lokal nga nagaharing sahi, gintum-ukan ni Aquino ang iya una nga inadlaw sa pagkonsolida sang papet nga hangaway. Nahibal-an ni Aquino nga ang Armed Forces of the Philippines (AFP) ang mayor nga sandigan sang reaksyunaryong paghari sa pungsod. Ini ang magaserbi nga mayor nga instrumento niya sa pag-uyat sa gahum kag pagpatuman sang mga hiliku-

ton. Amo gani nga todo ang pagsuporta niya diri: promisa sang dugang nga tinawo, bag-ong kagamitan, pabalay para sa mga suldado kag iban pa.

Wala niya ginkastigo ang AFP sa daku nga krimen sini sa pumuluyo. Sa sini, ginapabatyag ni Aquino ang pagsuporta niya sa malaut nga pasistang kampanya sang pagtapna sang AFP nga nagbunga sa linibo nga kaso sang paglapas sa tawhanong kinamatarung. Hayagan niya nga gin-

balewala ang reklamo sang pila ka pulo ka libo nga biktima sang kalakasan militar kag mga tagasakdag sang tawhanong kinamatarung. Wala gani siya nangako nga may matarung nga pagsukot sa tuman kadamu nga

pasistang krimen sa idalom sang nagligad nga rehimen kag pagsilut sa mga may utok sini nga upisyal sang papet nga militar kag pwersa pangseguridad.

Samtang todo-todo ang paglangis niya sa AFP, wala ni isa ka atensyon nga ginahatag si Aquino sa mga basehang problema sang banwa kag sa ila mga demanda para sa hustisya sosyal. Ang mga una nga adlaw niya sa poder ginsentro sa pagpasikat sang gindumili niya ang paggamit sang “wangwang” (sirena) sa karsada agud pagguwaon siya naga isa sa pumuluyo batuk sa pagpang-abuso sang mga poderoso.

Indi kuno siya bungol sa mga reklamo sang pumu-



**Mga tampok sa
isyu nga ini...**

**Seryoso bala si
Aquino sa sugilanon
pangkalinungan?**

PAHINA 5

**Bayan Muna
coordinator, ginpatay**

PAHINA 7

**Krisis sa European
Union, nagalala**

PAHINA 9

luyo, nagapa-inosente siya sa atubang sang demanda para sa duta sang masang mangunguma.

Nagasatsat siya bahin sa mga serbisyo pang-agrikultura pero wala siya sang ginahambal bahin sa pagbungkag sang monopolyong pagpanag-iya sa duta kag sa ginatuga sini nga kaimulon kag kapi-gusan sa mga mangunguma. Labi nga wala siya sang anuman nga sambit bahin sa Hacienda Luisita sang iya pamilya.

Nagamurahag ang tuman kadaku nga disempleyo kag ang tuman nga kakulang sang sweldo sang mga mamumugon. Pero ang solo niya nga matanyag amo ang pakitang-tawo nga plano nga "emergency employment" para kuno sa minilyon nga wala sang trabaho. Pareho sa nagligad, magatuga lang ini sang ilusyon sang empleyo. Wala ini sang matuod nga importansya bangud tuman kagamay kag hingalit ang anuman nga mahimo nga trabaho. Ginatakpan lang sini ang basehang problema sang pagkaatrasado sang ekonomya, kawad-on sang tunay nga nasyunal nga industriya kag pagtibusok lakip sang agrikultura.

Indi ini malubad ni Aquino sa pagsulit lang niya sang daan na

nga neoliberal nga permi ginasambit sang mga nagligad nga rehimen nga "paghatag sang patas nga kahigayunan para sa mga negosyo kag himuon nga makagalanyat ang pungsod sa mga dumuluong nga mamuhunan." Wala ini sang iban nga kahulugan kundi ang paghatag sang dugang nga kahilwayan para bahon ang pungsod sang mga sobrang produkto sang daku nga kapitalistang pungsod, ipiton ang gamay nga lokal nga

negosyante kag pumuluyo, waskon ang lokal nga pwersa sa produksyon, hugakumon ang dunang manggad kag himuslan ang barato nga kusog-pangabudlay sa pungsod.

Ang mga polisiya man nga ini kag lapnagon nga korapsyon ang rason kon ngaa nalubong subong ang reaksyunaryo nga gubyrno sa sobra nga pagkabangkap kag pagkautang. Sa pihak sini, wala sang plano si Aquino nga untaton ang pagpatuyang sang pinakadaku



nga bahin sang badyet sang gubyrno sa nagadaku nga bayad-utang. Indi magdugay magalabot man si Aquino sa pagpataw sang dugang nga mga buhis, paghugot sa gastos sa mga esensyal nga serbisyo sosyal, pagsapribado pa sang mga propyedad publiko kag dugang pa nga pagpangutang.

Indi makaguwa si Aquino sa daan na nga mga polisiya nga ginadikta sang imperyalismong US. Indi halambalanon para sa iya ang wala hawid nga paglapak sa pungsodnon nga kahilwayan sang Pilipinas, pagdambong sang ekonomya sang pungsod kag pagpanghimulos kag pagpamigos sa pumuluyo. Wala siya sang ginpabutyag nga plano nga rebyuhon ang indi patas nga tratado, o hangkaton ang nagapadayon nga interbensyon sang US sa pungsod.

Sa kamatuoran, ang mga disenyo sang imperyalismong US ang ginasunod niya subong sa iya linya sang kontra-rebolusyon. Ang deklarasyon niya nga "lutuson naton ang kaaway gamit ang katarungan, reporma pangkatilingban kag pagka-alalangay padulong sa mas maayo nga pagpangabuhi" halos eksakto nga kopya halin sa US Counterinsurgency Guide (USCG).

Nakasentro ini sa paghabig sa pagsalig sang pumuluyo gamit ang mga programa nga pagpakitang-tawo, pagpasikat kag pagpahamot samtang nakasalig sa pwersa sang pasismo agud tapnaon ang mga kritikal nga nagabato. Palamunon ang banwa sang mapaniplang kag wala sustansya nga propaganda samtang ginauyatan ang pusil nga nagataya sa ulo nila. Ini ang ubod



Tuig XLI No. 13 Hulyo 7, 2010

Ang *Ang Bayan* ginabantala sa leng-gwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa: angbayan@yahoo.com

Kaundan

Editorial

Aquino: itsura sg kontra-rebolusyon	1
Sugilanon pangkalinungan	3
Ipakita sanday Calubid	4
Bata nga CAGU sa SMR	4
Bag-ong daan nga kabinete ni Aquino	5
Depisit sa badyet	6
Arroyo, ginkasuhan	7
Pangurakot tubtob sa katapusan	7
Mga aksyon militar	8

Pagpanghalit sg pasistang estado

BM <i>coordinator</i> , ginpatay	9
Unyon sa ABS-CBN, ginguba	10
Mga mangunguma, gin-aresto	10
Cardeno	12
Krisis sa EU, nagalala	13
Aksyon-protesta sa Europe	14
50,000 nagwelga sa Bangladesh	15
Protesta batuk sa G8	15

Ang *Ang Bayan* ginabantala duha ka beses kada bulan sg Komite Sentral sg Partido Komunista sg Pilipinas

sang linya sang kontra-rebolusyon ni Aquino.

Wala sang paghatag importansya ang USCG sa sugilanon pangkalinungan bilang paagi para lubaron ang ugat sang gera sibil. Wala man sang ginapakita nga daku nga interes si Aquino nga liwat suguran ang sugilanon pangkalinungan sa tunga sang Gubyerno sang Republika sang Pilipinas kag sang National Democratic Front of the Philippines (NDFP).

Bisan pa man, bilang pagsabat sa nauna nga pahayag sang NDFP sang pagkabukas sini nga padayunon ang sugilanon pangkalinungan, gindeklarar sang bag-ong rehimen ang kahandaan man sini nga ipaagi sa negosasyon ang paglubad sang armadong inaway. Pero agud aktwal nga makaabante ang pagsugilanon, dapat kilalalon kag sakdagon sang bag-ong rehimen ang daan na nga mga kasug-tanan kag seryoso nga padayunon ang pagsugilanon sa nabilin pa nga mga adyenda.

Muklat ang mga rebolusyonaryong pwersa nga ang bag-ong rehimen ni Aquino pagpadayon lang sang nagligad nga rehimen. Bag-o man ang itsura, wala naman nagbag-o sa esensya. Ang estado nga ginapamunuan ni Aquino amo ang makasahing diktadurya sang mga mapanghimulos kag mapiguson nga amo man ang ginpamunuan nanday Arroyo kag mga nagtaliwan nga puno nga papet sang US.

Pareho sa mga panahon sang iban pa nga nagtaliwan nga papet kag reaksyunaryo, nakahanda ang rebolusyonaryong kahublagan nga atubangon ang bag-ong rehimeng US-Aquino agud maisulong ang pungsodnon kag demokratiko nga handum sang pumuluyo sa tanan nga patag sang paghimakas—sa patag sang armadong paghimakas, hayag nga paghimakas kag sugilanon pangkalinungan. **AB**

Seryoso bala si Aquino sa sugilanon pangkalinungan?

Kon basehan ang pamulong-pulong sa iya inagurasyon, manubo ang paghatag importansya ni Benigno Aquino III sa sugilanon pangkalinungan sa National Democratic Front of the Philippines bilang paagi agud resolbahan ang mga ugat sang armadong inaway.

Wala gani siya magpabati sang intensyon nga makigsugilanon sa NDFP kag sa tigaylo nagdeklarar nga “lutuson naton ang kaaway gamit ang katarungan, reporma pangkatilingban kag pagka-alala-ngay nga pagginubyrno padulong sa mas maayo nga pangabuhi.”

Pila ka adlaw pagkatapos sang inagurasyon, nagpahayag si Tere-sita Deles, ang Presidential Peace Adviser sang rehimeng Aquino, nga nagpadala na siya sang mensahe sa NDFP agud hambalon nga liwat pagabuksan ang nauntat nga sugilanon pangkalinungan kag tukuron na ang *peace panel* sang gubyerno pareho sang sa NDFP. Sabat ini sa nauna na nga pahayag sang NDFP nga handa atubangon ang rehimeng Aquino sa negosasyon agud hambalan ang mga ugat sang armadong inaway.

Ginkilala sang Partido Komunista sang Pilipinas (PKP) ang pahayag nga ini sang upisyal ni Aquino. Sa amo man, ginpahinumdom sini si Aquino nga para liwat masuguran kag mag-abante ang pormal nga sugilanon pangkalinungan, dapat niya nga sabton kag sakdagon ang tanan nga nagtaliwan nga kasug-tanan sa tunga sang NDFP kag sang reaksyunaryong gubyerno.

Lakip diri ang The Hague Joint Declaration of 1992 nga amo ang nagalatag sa mga prinsipyo, balayon, adyenda kag mga pamag-i para sa pagsugilanon, ang Joint Agreement on Safety and Immunity Guarantees (JASIG) kag ang Comprehensive Agreement on Respect for Human Rights and In-

ternational Humanitarian Law (CARHRIHL).

Ginalauman man sang PKP nga tadlungon ni Aquino ang ginhimo sadto ni Arroyo nga nakighimbon sa imperyalismong US kag iban pa nga imperyalistang pungsod para iupod sa ila listahan sang mga “dumuluong nga terorista” ang PKP, BHB kag ang puno nga pangpulitikang konsultant sang NDFP nga si Kaupod Jose Ma. Sison.

Nanawagan man ang PKP nga sukton kag ipakita sang gubyrnong Aquino ang mga konsultant sang NDFP pareho nanday Leo Velasco, Prudencio Calubid kag Rogelio Calubad kag mga istap sang NDFP nga gindukot sang mga pasistang ahente sang 2006 kag tubtub subong wala pa mapakita. Dapat man gilayon nga mahilway ang madamo nga iban pa nga illegal nga ginkulong nga konsultant kag istap sang NDFP kag iban pang nga aktibista kag aktibong mga kritiko sang papet nga reaksyunaryong estado kag sistema.

Ginaduso man sang PKP nga hatagan sang nagakaigo nga kalubaran ang mga kaso sang mabugat nga paglapas sa tawhanong kinamatarung. Angut sini, dapat ipatuman ang prubisyon sa CARHRIHL sang paghatag sang bayad-danyos sa mga biktima sang pasistang diktaduryang Marcos nga nagdaog sa kaso nga ginpasaka sadto sa US.

Dapat man hatagan hustisya ang tanan nga biktima sang wala pili nga pagsabwag sang teroristang kahadlok sa idalom sang nagligad nga rehimeng Arroyo. **AB**

Pagpakita kanday Calubid, ginaduso

Nagapanawagan ang Partido Komunista sang Pilipinas sining Hunyo 26 sa Armed Forces of the Philippines nga ipakita si Prudencio Calubid nga gindukot sang mga ahente militar apat ka tuig na ang nakaligad. Si Calubid myembro sang Komite Sentral sang PKP, upisyal sang Bag-ong Hangaway sang Banwa kag isa sa mga *peace consultant* sang National Democratic Front of the Philippines.

Gindukot siya upod ang iya asawa nga si Celina Palma, hinablos nga si Gloria Soco, kag duha ka istap nga sanday Ariel Belo kag Antonio Lacno sa Quirino Highway, bahin sang Sipocot, Camarines Sur sadtong Hunyo 26, 2006. Makaligad ang duha ka adlaw nga grabeng pagtortur sa ila, nakapalagyo si Lacno sang dalhon sila sa isa maligwin kag mabukid nga lugar agud patyon. Wala sang nakahibalo kon ano ang kapalaran nanday Calubid kag iban pa niya nga kaupdan tubtub sa subong.

Ang pagdukot kag pagpaantos kanday Calubid, Palma, Soco, Belo kag Lacno isa sa mga pinakamakasiligni nga krimen nga ginhimo sang mga pasistang ahente sang rehimeng US-Arroyo, suno sa PKP. Isa ini ka hayagan nga paglapak sa tawhanong kinamatarung kag paglapas sa Joint Agreement on Safety and Immunity Guarantees kag sang Comprehensive Agreement on Respect for Human Rights and International Humanitarian Law nga ginpirmahan sang magtimbang nga bahin, dugang pa sang PKP.

Ginabutang subong sang mga rebolusyonaryong pwersa sa Pilipinas sa bag-ong rehimen ni Benigno Aquino III ang responsibilidad para pasabton ang mga kriminal kag hatagan hustisya sanday Calubid kag iban pa nga biktima sang paglapas sa tawhanong kinamatarung.

Samtang, nabuhian sang buot ang mga paryente sang mga desaparecido (mga gindukot kag nadula gihapon tubtub subong) sang mag-

upod sining Hulyo 2 ang Commission on Human Rights (CHR) sa pagkumbinse kay Aquino nga

magpirma sa International Convention for the Protection of All Persons From Enforced Disappearance.



Dapat anay sini malagdaan sang indi magnubo sa 20 pungsod para mangin epektibo. May ara nga 18 pungsod nga nagpirma diri. Sa masobra siyam ka tuig nga paghari ni Arroyo nagrekord ini sang 1,206 kaso sang ekstrahudisyal nga pagpamatay, 205 kaso sang pagdukot sa mga aktibista lakip ang mga konsultant sang

NDFP sa sugilanon pangkalinungan, ginatos nga kaso sang pagpang-aresto kag ilegal nga detensyon kag masobra 1,000

kasong pagtortur nga lunsay kahimuan sang mga armadong gayang sang gubyerno. **AB**

AFP, nagarekrut sang mga bata nga kombatant

ISA sa mga gin-aresto sang Bag-ong Hangaway sang Banwa sang magtukod ini sang tsekpoynit sa Sityo Mabatas, Baryo Upper Ulip, Compostela Valley sang Hunyo 19 amo ang isa ka 17-anyos nga elemento sang Citizens Armed Force Geographical Unit (CAFGU) sa idalom sang 10th Infantry Division sang Philippine Army.

Nadakup si "Jomar" (indi matuod nga ngalan) samtang pakadto sa ila detatsment sa Mt. Diwalwal. Nakaangkas siya sadto sa motorsiklo ni S/Sgt. Bienvenido Gentugao Arguelles Jr. sang 25th IB.

Nausisaan ang matuod nga edad ni "Jomar" sang ipaidalom siya sa imbestigasyon sang Conrado Heredia Command sang BHB sa Southern Mindanao Region. Ginbun-ag siya sang Oktubre 1992. Bisan nga wala pa siya sang 16-anyos nga edad ginrekluta siya sang Oktubre 2008 sa grupong paramilitar sang Philippine Army. Nahibalan sang militar nga si "Jomar" menor de edad. Sa kamatuoran, 18 sila nga magkaedad nga ginapaidalom sa 45-adlaw nga paghanas sa hedkwarters sang 1001st Infantry Brigade sa Baryo Tuburan, Mawab, Compostela Valley.

Suno kay "Jomar," ginhatagan siya sang peke nga *birth certificate* nga nagasaad nga siya ginbun-ag sadtong 1990 imbes nga 1992. Amo man ang ginhimo sa mga kadungan niya nga menor de edad. Sang Disyembre 2, 2008 upisyal siya nga nangin elemento sang CAFGU sa isa ka seremonya sa 72nd IB Company Post sa Nabunturan, Compostela Valley.

Isa ka kombatant si "Jomar" sang siya maaresto sang BHB. Bisan pa man, wala siya gintrato nga isa ka "prisoner of war" (POW) bangud sa iya lamharon nga edad kag bilang pagrespeto sa iya kinamatarung. Handa siya nga paulion sang BHB sa iya mga ginikanaan kung wala sang himuon nga mga sablag para sa iya gilayon nga paghilway. **AB**

Ang bag-o nga daan nga kabinete ni Noynoy Aquino

Bahin sang Hyatt 10, bahin sang daku nga kumprador kag bahin sang Kamag-anak kag Kaklase Inc. Amo sini malaragway ang kadam-an sang gintukod nga kabinete sang rehimeng US-Aquino. Ginsimpon nga daan nga mga burukrata kag pulitiko nga nagserbi sa ginakangil-aran nga rehimeng Arroyo; malapit nga paryente kag abyan; kag pinakadaku nga kontribyutor sang iya kampanya. May pila lang nga possible pa malauman sang pumuluyo.

Ang Hyatt 10 amo ang bansag sa napulo nga upisyal sang kabinete ni Gloria Arroyo humalin 2001-2005 nga daan kahimbon ni Arroyo sa nagkalain-lain nga kagarukan,

pero nagbiya sa pwesto makaligad mabuyagyag ang pagdinaya ni Arroyo sa eleksyon 2004. Ang mga kabahin sa Hyatt 10 nga liwat ginnombrar ni Aquino sa pwesto amo sanday Cesar Purisima (ginbalik sa Department of Finance); Florencio Abad (daan nga Department of Education, subong ara sa Department of Budget and Management), Teresita Deles (ginbalik bilang Adviser on Peace Process) kag Corazon "Dinky" Soliman (ginbalik sa Department of Social Welfare and Development).

Ginpabilin man nga sekretaryo sang Department of Foreign Affairs si Roberto Romulo. Nagserbi man sa idalum ni Arroyo si Rosalinda Baldoz (Department of Labor and Employment), Enrique Ona (Department of Health) kag Ramon Paje (Department of Environment and Natural Resources). Nagsaka man sa pwesto sa Bureau of Internal Revenue si Kim Jacinto-Henares, daan nga nagdumala sang pagkolekta sang buhis sa daku nga kumpanya.

Halin sa daku nga negosyo, ginhatagan ni Aquino sang mataas nga pwesto sanday Alberto Lim (Department of Tourism) nga presi-



dente sang Makati Business Club; Gregory Domingo (Department of Trade and Industry) halin sa SM Investments Inc. kag Belle Corp.; Rogelio Singson (Department of Public Works) halin sa Maynilad Water Services; kag Jose Almendras (Department of Energy) nga nagserbi bilang presidente sang Manila Water. Ginatiglas sang mga ini ang daku nga burgesya kumprador sa pangkabilugan kag ang mga pamilya nga Sy, Ayala, Razon, Pangilinan kag Lopez sa partikular, nga lunsay nangin daku nga kontribyutor sa kampanya ni Aquino.

May iban pa nga nagserbi sa idalum sang rehimen ni Cory Aquino kag may personal nga katampad sa pamilya Aquino. Lakip diri sanday Voltaire Gazmin (puno sang Presidential Security Group (PSG) sang Malacañang sa panahon sang una nga rehimeng US-Aquino kag subong puno sang Department of Defense), Cayetano Paderanga Jr. (ginbalik sa daan niya nga ginayatan nga Department of Socio-Economic Planning kag bilang puno sang National Economic Development Authority) kag Jose "Ping" de Jesus (Department of Transportation and Communication). Si De Jesus presidente sang Meralco antes siya liwat ginnombrar sa kabi-

nete. Bisan ang bag-ong hepe sang AFP nga si Lt. Gen. Ricardo David daan nga upisyal sang PSG sang una nga rehimeng Aquino.

Ginbutang ni Aquino ang iya suod nga abyan kag madugay na nga personal nga abugado nga si Paquito "Jojo" Ochoa Jr. bilang Executive Secretary. Ginnombrar man ang abyan nga si Bro. Armin Luistro, presidente sang La Salle, bilang sekretaryo sang Department of Education. Ang iban nga tinawo o paryente sang iya mga tagasuporta pareho nanday Julia Abad, anak ni Florencio Abad kag ginbutang para mamuno sa Presidential Management Staff kag Col. Ramon Dizon (daan nga elemento sang PSG sa idalum ni Cory Aquino kag subong hepe na sini).

Wala man sang upisyal nga katungdanan sa kabinete, daku ang papel sang apat nga utod nga babaye ni Aquino sa proseso sang pagdesisyon sang iya rehimen. Nakapungko sa lain-lain nga komite ang mga ini, lakip ang desaysibong komite nga nagrekomenda sang mga ngalan sa gintukod nga kabinete kag iban pang pusisyon. Misimo si Aquino ang nagahambal nga tanan sang iya mga desisyon ginapaabot anay niya sa iya mga utod.

Pagpadayon sang mga daan nga polisiya

Isa ka matingkad nga kinaiya sang bag-o nga daan nga kabinete amo ang pagbutang sang masupog nga tagapangapin sang liberalisasyon kag deregulasyon sang lokal nga ekonomya. Wala ini sang gintuhay sa mga upisyal sang rehimeng Arroyo nga nagbangkrap sa ekonomya kag nagsamad sa pangabuhian sang pumuluyo. Pangunahon na diri si Paderanga, nga nagduso sang lubos nga liberalisasyon halin pa sa panahon sang una nga rehimeng Aquino. Ara man si Purisima (Finance) nga nagduso sang ginpasangkad nga Value Added Tax

sang 2005. Isa sa mga una nga plano sang rehimeng Aquino amo ang pribatisasyon sang bahin sang gubyrno sa Malampaya Project, Sucat *thermal power plant*, Navotas *gas turbine plant* kag Malaya *thermal power plant*.

Lapnagon kag mabaskog ang pagpamatuk sang Uniffors (organisasyon nga ginapatapuan sang madamu nga upisyal kag istap sang Department of Foreign Affairs) sa pagpabilin kay Romulo sa DFA. Mabaskog nga ginkundenar man sang mga progresibong grupo ang pagpabilin sa iya. Napunan ang rekord ni Romulo sang pag-ikog-ikog sa interes sang imperyalismong US. Ginhatagan-dalan ni Romulo ang paghilway kay Daniel Smith, isa ka suldado sang US nga nasentensyahan sa paglugos kay Nicole sang 2005 sa Subic Bay. Si Romulo mabaskog man nga tagapangapin sang Visiting Forces Agreement kag sang permanente nga presensya sang tropa sang US sa pungsod.

Mabaskog man ang pagpamatuk sang mga progresibong unyon sang mga mamumugon kag mga organisasyon sang migrante sa pagbutang kay Baldoz sa DOLE. Si Baldoz may malaut kag inutil nga rekord bilang tagapangulo sang Philippine Overseas Employment Administration.

Ginakundena man ang pagbutang kay Ramon Paje sa DENR, nga nagserbi nga puno sang Minerals Development Council, isa sa mga pinakamasupog nga tagasakdag sang dumuluong kag daku nga pagmina sa pungsod.

Ginkastigo man ang pagbutang kay Ona sa DOH sang Health Alliance for Democracy (HEAD). Suno sa HEAD, dalahig si Ona sa pagnegosyo sang *kidney* sa mga dumuluong sang siya ang Executive Director sang National Kidney and Transplant Institute. AB

Nagahana ang dugang nga buhis, pagkinot, pagpangutang

Pinanubli sang rehimeng Arroyo sa rehimeng Aquino ang pinakadaku nga depisit sa badyet sa kasaysayan sang pungsod. Para sa tuig 2010, ginatantya nga magaabot ini sa P340 bilyon o 4.2% sang Gross Domestic Product (GDP) o kabilugan nga lokal nga produksyon. May depisit sa badyet kon ang isa ka gubyrno nagagasto sang mas daku sangsa nakolekta sini ng buhis.

Para matabunan ang depisit, paliwat-liwat lang ang ginahimo sang reaksyunaryong gubyrno: ang panaugan sang nagapadaku nga buhis ang pumuluyo, buhinan ang pondo sa mga basehang serbisyo pangkatilingban kag mangutang sa sulod kag guwa sang pungsod.

Sang 2005, si Finance Secretary Purisima mismo ang nagsuhestyon nga mas pasangkaron ang sakop sang Value Added Tax (EVAT) para pun-an ang depisit sa badyet. Isa man ang bag-o nga BIR Commissioner nga si Kim Henares sa mga nagduso sini. Napasar kag natatuman bilang layi ang EVAT sa pi-hak sang pagpamatuk sang pumuluyo. Binilyon ang nahugakom sang rehimeng Arroyo, labi na sa panahon nga nagsinaka ang presyo sang mga balaklon kag serbisyo.


Sang Hunyo, ginsuhestyon ni Margarito Teves, sekretaryo sang Department of Finance ni Arroyo, nga liwat pataason ang EVAT halin 12% pakadto 15%. Ini man ang bilin sang World Bank kag iban pang imperyalistang institusyon. Indi ini paghimuon sang bag-o nga gubyrno, promisa ni Aquino. Mahimo indi sa gilayon pero indi ini malikawan, bawi ni Purisima.

Para mabuhinan ang depisit, pagalagson kuno sang rehimeng Aquino ang daku nga kumpanya

nga nagalikaw magbayad sang buhis kag mga dalahig sa ismagling. Ginatantya nga magaabot sa P150 bilyon ang madula sa gubyrno bangud sa indi pagbayad sang buhis kag ismagling. Pero sining nakaligad nga mga tuig, pila lang ang nakasuhan nga mga korporasyon kag nagalab-ot lang sa P110 milyon ang natipon sang BIR halin sa mga ini. May suhestyon pa nga buhinan ang buhis sa mga negosyo halin sa 30% pakadto 20%. Mas daku pa ang nagakadula nga kita tuga sang pagnubo ukon pagdula sa mga taripa nga ginabutang sa mga ginaangkat nga produkto sandig sa mga polisiya nga deregulasyon kag liberalisasyon.

Ano pa man ang ginbuhian nga promisa ni Aquino, sa ulihi indi niya mabalewala ang sobra kadaku na kag padayon nga nagadaku nga depisit, kag angut man sini ang nagapadaku man kag padayon pa nga paghabok sang utang sang gubyrno. Pila ka adlaw pa lang sa pwes-to, ginaduso na sang bag-o nga komisyoner sang BIR ang pagpangulekta sang Value Added Tax sa mga *toll fee* sa anum ka mayor nga *expressway* sa Luzon.

Pareho sa nagligad, wala sang iban nga madangpan ang rehimeng Aquino: bag-o nga pagpangutang, dugang nga buhis kag pagkinot sa mga galastuhan pangkatilingban. Sa pagkabangkarote sang gubyrno, pabug-at nga pabug-at ang palas-anon sang banwa. AB



Arroyo, ginkasuhan sang korapsyon

Isa ka adlaw pagkatapos sang pagdumili nga pasakaan sang asunto si Gloria Arroyo, gilayon nagpasaka sang kasong korapsyon batuk sa iya ang Bayan Muna. Ang kaso ginpasaka nanday Teodoro Casiño kag Atty. Neri Colmenares sang BM sa Department of Justice sining Hulyo 1.

Partikular nga ginkaso kay Arroyo ang pagsulod sang gubyrno sa maanomalya nga proyekto nga NBN-ZTE. Ang proyekto, nga may plano nga anguton ang tanan nga upisina sang gubyrno paagi sa *internet* sa balor nga \$329 milyon, nauntat sang mabuyagyag ang mga anomalya diri. Nadalahig man diri ang asawa ni Gloria nga si Mike Arroyo kag iban pang upisyal sang rehimeng Arroyo. Hungod nga ginpasobrahan sang \$130 milyon ang proyekto para makuhaan ini sang daku nga kikbak para sa mga Arroyo kag malapit nila nga idu-ido.

Siling nanday Casiño kag Colmenares, hungod nila nga ginpasaka ang kaso sa DOJ bangud wala si-

la sang salig sa Office of the Ombudsman nga ginapamunuan ni Merceditas Gutierrez, suod nga abyan sang mga Arroyo. Sa nauna nga desisyon sang Ombudsman, wala sini gin-upod sanday Gloria kag Mike Arroyo sa listahan sang mga rekomendado nga kasuhan sa Sandiganbayan. Ang kasuhan lang sanday anay COMELEC Commissioner Benjamin Abalos kag anay NE-DA Director Romulo Neri. Ginabswelto man ang apat nga upisyal sang kumpanyang Tsino nga ZTE nga kahimbon nanday Arroyo sa anomalya.

Wala na ginhulat nanday Casiño kag Colmenares ang imbestigasyon nga himuon sang gintukod nga

Truth Commission bangud manggaranon na siling nila ang dokumentasyon sang Senado sa kaso nga NBN-ZTE sa mga pagbista sini. Ang Truth Commission nga ginapamunuan ni anay Chief Justice Hilario Davide Jr. gintukod sang rehimeng Aquino para imbestigahan liwat ang mga kaso nga nagtingkad sa idalom sang rehimeng Arroyo.

Ginalagas man nanday Casiño kag Colmenares nga kabigon nga kaso nga administratibo ang reklamo batuk kay Arroyo para pwede siya nga suspindihon bilang representante sang Kongreso samtang ginabista ang kaso.

Ang pagpasaka sang BM sang kaso nga korapsyon batuk kay Arroyo amo ang una sa serye sang mga kaso batuk sa iya. Siling sang BM, kon nakonsolida na ang tanan nga mga reklamo pareho sang anomalya sa *fertilizer fund*, iskandalo nga Hello Garci, Philhealth *cards* kag kontrata sa Venable, pasakaan na nila sang kaso nga pagpangdambong si Arroyo. **AB**

Kurakot tubtub sa katapusan

Tubtub sa pinakaulihi nga segundo, kurakot gihapon ang yara sa isip sang mga idu-ido ni Gloria Arroyo.

Ginbuyagyag sining Hulyo 1 sang daan nga puno nga akawntant sang Department of National Defense (DND) ang pagpang-ipit nga ginhimo sa iya ni anay DND Secretary Norberto Gonzales para aprubahan ang pagpagwa sang P5 milyon nga “pondo nga paniktik.” Wala nagpasugot sa mandu ni Gonzales si Leticia Obnimaga, gani ginpatalsik siya sa pwesto. Ginhalinan sang korapsyon ang mga “pondo nga paniktik” bangud wala na ginpaidalom sa awditing ang mga ini.

Ginbuyagyag man ni Obnimaga nga kwestyunable ang pagpaguwa sang pondo para sa byahe nanday

DND Undersecretary Arturo Lomibao kag iban pang upisyal sang departamento sa Singapore kag iban pang pungsod sining ulihi nga bahin sang Hunyo, bangud pila lang ka adlaw bayaan na nila ang ila nga mga pwesto.

Samtang, ginbuyagyag man sang Hunyo 14 ni Annabelle Abaya, anay nagapamuno sang Office of the Presidential Assistant on the Peace Process (OPAPP), ang lapnagon nga korapsyon sa ahensya nga ini. Ginsiling niya nga nagaabot sa P170 milyon sang P500 milyon nga pondo sang OPAPP nga dapat para sa Social Integration Program (SIP) o ayuda pangpangabuhian kuno para sa mga nagasurender nga rebelde) ang nagamit para sa mga di kinahanglanon nga bonus kag ala-

wans sang mga upisyal kag tinawo sang ahensya.

Ang unang tunga sang pondo naubos sa sulod lang sang isa ka tuig. Ang ikaduhang tunga, nga nag-abot na sa ginapamunuan ni Abaya ang OPAPP sang Nobyembre, gingamit sa kadam-an para sa di awtorisado nga pagbakal sang salakyan, pagtukod kag pagpatahom sang mga upisina, pagbyahe, mga suplay kag iban pang gastos nga ginahibalo pa gihapon tubtub subong. Traynta’y sais ka porsyento lang sang SIP ang nagkadto sa mga nagakadapat nga benepisyaryo.

Sa iya nga pagbuyagyag, ginkumpirma lang ni Abaya ang malawig na nga naandan sa OPAPP sang paggamit sa SIP bilang isa sa pinakadaku nga bulugasan sang mataas nga upisyal sang AFP kag mga burukrata. **AB**



Mga aksyon militar

Siyam ka elemento sang kaaway ang napatay kag 11 ang napilasan sa pito ka separado nga aksyon militar sang Bag-ong Hangaway sang Banwa (BHB) halin Hunyo 18 tubtub Hulyo 2.

Hulyo 2. Duha ka suldado ang napilasan sang maengkwentro nila ang mga Pulang hangaway sang BHB sa Sityo Lawaon, Barangay Baracatan, Toril District, Davao City.

Hunyo 30. Duha ka tropa sang 66th IB ang napilasan sang salakayon sang mga Pulang hangaway sang BHB ang ila detatsment sa Baryo Cambagang, Maragusan, Compostela Valley.

Hunyo 25. Napilasan ang isa ka sarhento sang 47th IB nga amo ang nagapamuno sa isa ka *patrol base* sa Baryo Santo Rosario, Jaminan, Capiz sang maglunsar sang aksyon harasment ang BHB sa idalom sang Jose Percival Estocada Jr. Command sang Central Front sa Panay. Ang *patrol base* nga ini pila ka kilometros lang ang kalayuon sa hedkwarters sang 3rd ID sang Philippine Army.

Antes ini, gintuyo nga lusubon sang militar sang Hunyo 18 ang ginakampuhan sang BHB sa Central Negros sa Sityo Igapatao, Baryo Tacpao, Guihulngan City, Negros Oriental apang sila pa ang nagagom sang kaswalti. Apat ka elemento sang 11th IB kag 2nd Scout Ranger Company ang napatay sang maengkwentro nila ang mga Pulang hangaway sa idalom sang Leonardo Panaligan Command.

Pilit nga ginpanginwala ni Col. Maximo Caro, kumander sang 303rd Infantry Brigade, ang ila naagum nga kaswalti sa pagsiling nga ang BHB nag-agum sang apat ka patay kag siyam ang napilasan. Bisan pa man, indi matago sang militar nga ang ila napatay nga mga suldado

gindala sa Riverside Medical Center sa Bacolod City kag ang mga napilasan ginpabulong sa Cebu City, suno kay JB Regalado, tagapamaba sang Leonardo Panaligan Command sang BHB.

Hunyo 24. Ginsalakay sang mga Pulang hangaway sang BHB ang upisina sang Eldore Mining Corp. sa Dumangdang, Labo, Camarines Norte. Gindisarmahan sang mga Pulang hangaway ang nasorpresa nga mga pribadong gwardya sang minahan. Ang Eldore Mining Corp. isa ka daku nga dumuluong nga kumpanya nga nakabase sa Australia.

Hunyo 23. Duha ka suldado ang napatay kag isa pa ang napilasan sa pag-ambus sang BHB sa mga tropa sang 3rd Special Forces Company-1st Special Forces Battalion sa Sityo Bigaan, Mamala, Sampaloc, Quezon. Nagapabalik sila sa ila hedkwarters samtang sakay sa isa ka Lite Ace Van sang matabo ang ambus.

Yara sa maayo nga pusisyon ang mga Pulang hangaway gani epektibo nila nga nabatuan ang nagabato nga mga pasista nga kaaway. Duha ka M26 ang naagum sang BHB antes sila mag-atras. Ang armas nga M26 MASS (Modular Accessory Shotgun System) kumbinasyon sang isa ka riple kag 12-gauge shotgun kag pwede nga ikabit sa istandard nga riple nga M-4 o M16 pareho sang M203 *grenade launcher*. Ginagamit ini subong sang mga suldado nga impantri kag *special operations forces* sang US Army.

Sang adlaw man nga ina, isa ka

suldado sang Philippine Air Force (PAF) ang napatay kag duha ka iban pa ang napilasan sang ambuson sila sang BHB sa Barangay Calantas, Calaca, Batangas. Nakasakay ang mga suldado sang PAF sa isa ka motorsiklo.

Hunyo 18. Tatlo ka tropa sang 1105th Police Mobile Group-Philippine National Police (1105th PMG-PNP) ang napatay kag lima ka iban pa ang napilasan sang salakayon sang mga Pulang hangaway sang Antonio Nerio Antao Command (ANAC)-Front 15 ang detatsment sang mga pulis sa Sityo Dao, Baryo Poblacion, Cateel, Davao Oriental.

Para tabunan ang ila kahuyanan, butigon nga ginbalita sang mga propagandista sang PNP-Police Regional Office XI nga ila napaslaw ang pagsalakay sang BHB kag nakapatay sila sang lima ka Pulang hangaway luwas pa sa tatlo ka pilason.

Ang aksyon militar nga ini isa man ka aksyon pagsilot, suno kay Dyomabuk Kadyawan, tagapamaba sang ANAC. Daku ang krimen sang nasambit nga mga pulis. Nadalahig sila sa pagpatay sang isa ka tuig kay Ludenio "Dos" Monson, aktibo nga kritiko sang mga abuso sang 1105th PMG-PNP sa Boston. Nadalahig man sila sa pagpalapnag sang ilegal nga droga kag pagkuha tong sa mga komersyal nga trak nga naggaagi sa detatsment. Madamo nga beses na nga ginaduso sang mga residente nga palayason na ang detatsment.

Pagkatapos ang hitabo, ginpaupok sang mga pulis ang ila kaugot sa mga wala sang inugbato nga sibilyan. Apat ang ginsumbag kag arbitraryo nga ginhalughog ang mga balay sang mga ginaspetsahan nga nagasuporta sa mga gerilya sang banwa, dugang ni Dyomabuk Kadyawan.

AB

BM *coordinator*, ginpatay

Isa ka *provincial coordinator* sang Bayan Muna ang pinakauna nga biktima sang ekstrahudisyal nga pagpamatay sa idalom sang rehimen ni Benigno Aquino III. Ginpatay man ang isa ka peryodista sa Kalinga kag isa ka saksi sa makangilidlis nga masaker sa Maguindanao, samtang ginhingabot ang kabuhi sang isa ka pari sa Aurora.


Hulyo 5. Ginpatay sang mga wala pa makilala nga kriminal si Fernando Baldomero, 61, *provincial coordinator* sang Bayan Muna sa Aklan. Si Baldomero napilian sa ikaduha nga kahigayunan bilang konsehal sa banwa sang Lezo sang nagligad nga eleksyon. Yara sa iya balay si Baldomero sa Barangay Estancia, Kalibo, Aklan kag nagahanda nga idul-ong ang iya 12-tuig ang edad nga bata nga lalaki sa eskwelahan sang siya gintiro. Antes ini, ginhingabot man ang kabuhi ni Baldomero sang habuyan sang granada ang iya balay sang Marso 19.

Hulyo 3. Gintiro kag napatay si Jose Daguiro, 75, sa iya puluy-an sa Tuga, Tabuk, Kalinga sining Hulyo 3. Si Daguiro reporter sang "Radyo Natin Tabuk" kag kolumnista sang isa ka lokal nga pahayagan sa Kalinga. Pagkatapos lang magpanya-

pon ni Daguiro sang tiruhon siya sang wala pa makilala nga kriminal.

Hunyo 26. Gintiro sang mga elemento nga anti-komunista ang hulot-tulugan ni Fr. Joefran Talaban sa Casiguran, Aurora alas-2 sang kaagahon. Nakaluwas siya sa pagpaniro. Nagbilin sang naka-laminate nga polyeto ang mga kriminal nga pirmado sang grupo nga ginatawag nga Aniban nang Ayaw sa Komunista. Ginapalayas nila si Fr. Talaban nga siling nila may "angut sa mga Komunista." Nagpalagyo ang mga kriminal paagi sa itom nga kotse nga wala sang plaka.

Si Father Talaban siyam ka tuig nga pari sang Nuestra Señora de la Salvacion. Samtang, nagpanawag-



an ang World Council of Churches (WCC) kay Benigno Aquino III nga gilayon nga hatagan sang katarungan ang duha nga ginpatay nga tawong-simbahan sining Hunyo. Nagpanawagan ini bilang pagpakig-isa sa National Council of Churches in the Philippines kag Iglesia Filipina Independiente (IFI) sa pag-atake sa ekstrahudisyal nga pagpamatay kanday Benjamin Bayles sa Negros Occidental kag Jovelito Agustin sa Laoag City, Ilocos Norte. Si Bayles ginpatay sadtong Hunyo 14. Pagkaaga, si Agustin naman ang ginpatay. Pareho nga mga ministro sang IFI ang duha. Si Agustin brodkaster man sa radyo sa Ilocos Norte.

Hunyo 14. Ginpatay ang isa ka yabi nga saksi sa masaker sa Maguindanao. Si Suwaib Upham, nakilala sa hayo nga Jesse, ginapatihan nga ginpapatay sang pamilya nga Ampatuan. Nag-ako si Upham nga isa siya sa pito nga nagtiro sa nagalab-ot sa 57 biktima, lakip ang 32 peryodista sadtong Nobyembre 23, 2009. Gintudlo niya nga utok sa masaker ang pamilya nga Ampatuan.

Una nga naglutaw nga saksi si Upham sadtong Marso 19. Gindala siya sa Maynila para mag-aplay sa Witness Protection Program sang Department of Justice.

Nagbalibad nga makipagkita si Upham sa mga upisyal sang DOJ sa mismo nga ugsaran sini bangud sa impormasyon niya nga nagabuligay sa mga Ampatuan ang pila ka mataas nga upisyal sang departamentto.

Ginpakamalaut sang madamo nga grupo kag organisasyon ang pagpatay kay Upham. Lakip sa mga ini ang Human Rights Watch nga nakabase sa US. AB

Sundon ang baganihan nga kabuhi ni Kaupod Azad

SUNDON ang pagkabaganihan ni Kaupod Azad (Cherukuri Rajkumar), siling sang Partido Komunista sang Pilipinas (PKP) sa isa ka pahayag sining Hulyo 5. Nagapakig-unong ini sa pumuluyong Indian kaangut sa pagpatay sang pulis sa isa ka nagapanguna nga rebolusyonaryong lider sang pungsod. Gindukot kag ginsalbeyds si Ka Azad sang mga katapu sang Andra Pradesh Special Police Branch sadtong Hulyo 2 sa kagulangan sang Adilabad malapit sa dulunan sang Maharashtra kag Andra Pradesh. Upod niya sadto si Ka Hem Pandrey (Jitender).

Si Ka Azad katapu sang Komite Sentral sang Partido Komunista sang India (Maoista) kag nagserbi nga tagapamaba sini antes siya patraidor nga ginpatay sang mga pasistang pulis. Masobra tatlong dekada niya nga ginhalad ang iya kabuhi sa rebolusyonaryong handum sang pumuluyo nga Indian. AB

42 aktibista, gin-aresto sa Mendiola

Naglab-ot sa 42 mangunguma kag mga aktibista ang gin-aresto sang mga pulis pagkatapos bungkagon ang ila aksyon protesta sa Tulay sang Mendiola sa Maynila sang Hulyo 3.

Kadam-an sa gindakop mga mangunguma halin sa Hacienda Luisita Inc. sa Tarlac kag Hacienda Yulo sa Laguna. Upod man sa mga gindakop ang *campaign officer* sang Unyon ng Magsasaka sa Agrikultura (UMA) nga si Servillano Luna Jr.

Ang mga aktibista nagakampo na sa Mendiola halin pa sang Hunyo 30, isa ka adlaw bag-o magpungko si Benigno "Noy" Aquino III bilang bag-ong presidente.

Suno sa mga mangunguma, pangunahon nga ginademanda nila ang

pagpatuman sang matuod nga re-porma sa duta. Ginaduso nila ang pagpanagtag sang 6,000 ektaryas sang Hacienda Luisita kag 7,000 ektaryas nga Hacienda Yulo. Pero sa baylo nga buligan sila ginbungkag pa ang ila piketlayn sang mga



elemento sang Manila Police District (MPD) Sta-tion 8. Gilayon nga ginkundena sang Anakpawis Party ang mapintas nga pagbungkag sa piket sang mga mangunguma. Suno kay Rep. Rafael Mariano, ang 42 ang una nga kaswalti sang rehimeng Aquino kag ang pagkaaresto sa ila senyales nga

magapadayon ang paglapas sa tawhanong kinamatarung.

Napilitan nga hilwayon sang mga pulis masunod nga adlaw ang mga gin-aresto kag gin-atras ang ginpasaka nga mga kaso.

Samtang, padayon nga nagaa-gom sang pagpamahog ang mangunguma sa Hacienda Luisita kag Hacienda Yulo sa kamot sang mga suldado.

Suno sa Alyansa ng Manggagawang Bukid sa Asyenda Luisita (AMBALA), ginasundan sang mga suldado nga may dala nga pusil ang mga lider mangunguma sang asyenda sa diin man sila magkadto. Ginapahog man ang mga residente sang asyenda nga indi na maghimakas para sa ila mga duta. Nagpadala man sang mga elemento sang Citizens Armed Force Geographical Unit (CAFGU) sa isa ka barangay sa asyenda kag padayon nga nagarek-rut sang mga Barangay Intelligence Network (BIN). Ginbungkag man ang piketlayn sang mga mangunguma sang Hacienda Yulo sang Mayo 21 kon sa diin 100 ang ginsakit kag napulo ang ginpreso. **AB**

Pagguba sang unyon sa ABS-CBN, ginkundena

Ginkundena sang Unyon ng mga Manggagawa sa ABS-CBN ang pagpangguba sang maneydsment sa Internal Job Market (IJM) Workers Union kag iligal nga pagpatalsik sa 25 unyonista.

Iligal nga ginpatalsik sang maneydsment sang ABS-CBN, isa sa pinakadaku nga istasyon sang radyo kag telebisyon sa pungsod, ang 25 ka mamumugon sini pagkatapos sila magbalibad nga magpirma sang kasugtanan nga nagasaad nga sila kontraktwal lang kag nagdumili sa ila nga magpasaka sang anuman nga kaso batuk sa kumpanya.

Nakasaad man sa kontrata nga

magabaton sila sang mas manubo nga sweldo (halos sangkatlong parte lang kumparar sa nagligad), indi makabaton sang kabayaran para sa obertaym kag mga ispesyal nga adlaw o bakasyon. Indi na pagkilalanon ang daan nila nga serbisyo sa kumpanya amo nga wala sila sang kinamatarung nga maghingyo sang *back pay* para sa tinion nga nagapabilin sila nga

kontraktwal bisan pwede na sila nga himuon nga regular. Kuhaon man ang ila kasiguruhan sa trabaho bangud indi na sila sigurado nga iga-employo kon madula madula ang programa sa telebisyon kon sa diin sila nagatrabaho.

Suno kay Antonio Perez, presidente sang unyon, *video editor* sang istayon kag lakip sa mga ginpatalsik, dapat sila nga tratuhon sang kumpanya nga mga regular nga empleyado bangud kadam-an sa ila may pila na ka tuig nga nagatrabaho sa istasyon. Sala, siling niya, ang ginarason sang kumpanya nga sila indi matuod nga empleyado sang kumpanya kundi lakip lang sila sa ABS-CBN Internal Job Market (IJM) o listahan sang mga mamumugon nga may ikasa-


rang o talento nga pwede pagapili-an nga kontratahon sang kumpanya suno sa kakinahanglanon nila. Liwas sa ginasiling sang ABS-CBN, nga nakasulat sa mga *payslip*, *identification card*, *income tax return* kag iban pang dokumento nga sila empleyado sang kumpanya kag indi sang IJM.

Naglab-ot sa 1,400 sa 2,700 empleyado sang ABS-CBN ang ara sa idalom sang IJM nga sa aktwal ginapanag-iyahan kag ginapadalagan man sang ABS-CBN. Halos 100 lang sa 1,400 nga ini ang ginhimo nga regular nga empleyado sang magpirma sang kontrata ang ABS-CBN sining Hunyo para kuno himuon nga regular ang mga ara sa IJM. Ginkwestyon sang mga mamumugon ang programang IJM sa Department of Labor and Employment (DOLE). Siling nila, ginagamit lang sang ABS-

CBN ang IJM bilang bubon sang mga kaswal nga mamumugon. Pero gindampigan sang DOLE ang ABS-CBN kag ginsiling nga nagsanto kuno ini sa Labor Code.

Ginkundena sang mga mamumugon ang indi pagkilala sa ila unyon. Wala gin-aprubahan sang DOLE ang aplikasyon sang unyon para sa Certification of Election (CE) sang Nobyembre 2009 bangud indi kuno mga regular nga empleyado ang ara sa IJM.

Maathag, suno kay Perez, nga nag-



himbunanay ang ABS-CBN kag DOLE para wasakon ang unyon. Gintukod ang unyon sang Marso 2009.

Padayon gihapon ang ginahimo nga harassment sa mga katapu sang unyon. Ginabag-o-bag-o, ginakansela o ginaadyas ang ila nga mga iskedyul sa trabaho. Nagahana na ang pagpahalin sa dugang 100 ordinaryong empleyado kag iban pa nga mamumugon.

Ginkuha man sang kumpanya ang serbisyo sang HRH Agency Personnel para islan na ang IJM kag indi kilalahon ang unyon. Plano man nga magkuha sang iban pa nga empleyado ang kumpanya halin sa mga sanga sini sa iban nga rehiyon para ibulos sa ginpahalin nga empleyado.

Isa ang ABS-CBN sa mga nagapanguna nga 1,000 korporasyon sa pungsod. Sa idalom ini sang mga Lopez Group of Companies kag may ara kabilugang kita nga P1.9 bilyon para sa unang kwarto pa lang sang tuig. Upod ang mga Lopez sa naghatag sang pinakadaku nga kontribusyon sa kampanya ni Benigno Aquino III sang eleksyon. **AB**

Pagkamatay ni Cardeño, liwat nga imbestigahan

Liwat nga nagtampok ang halambalanon sang pagpasilabot-militar sang US sa Pilipinas sang aprubahan sang Korte Suprema sining Hunyo 24 ang petisyon para sa *writ of amparo* kag *writ of habeas data* sang pamilya sang isa ka sibilyan nga misteryoso nga napatay sa sulod sang pasilidad-militar sang US sa Marawi City. Base diri, ginatagaan sang proteksyon sang korte ang pamilya sang biktima kag may kinamatarung man sila nga tagaan sang tanan nga mga upisyal nga dokumento kag impormasyon nga makabulig sa pagsolbar sa kaso.

Si Gegan Cardeño, 33 anyos, ginreport nga naghikog sa iya hulot sa talatapan sang Joint Special Operation Task Force-Philippines sa Marawi City sang Pebrero 2, duha ka adlaw lang matapos siya magabot sa kampo. Nag-aplay siya bilang *security guard* sa *employment agency* nga Skylink kag ang upisyal niyang destinasyon amo ang Camp

Siongco sa Awang, Datu Odin Sinsuat, Maguindanao. Pero imbes dal-on siya didto, gindala siya sa hedkwarters sang JSOTFP sa sulod sang 103rd Infantry Brigade sang Philippine Army. Ginhimo siya nga tagasalhin sang mabal-an sang mga suldadong US nga eksperto siya sa Bisaya, Tagalog, Ingles, Tau-sog kag Bahasa Indonesia.

Bag-o siya mapatay, nagtawag kag nag-text pa si Cardeño sa iya pamilya. Siling niya, iban ang ginapahimo nga trabaho sa iya kag gusto na niya nga mag-atras. Siya lang kuno ang Pilipino sa sulod sang pasilidad sang US, luwas sa kusinero.

Ginapaguwa nga nagpakamatay si Cardeño pero wala ginpatihan sang iya pamilya, labi na nga madamo siya sang pilas kag iban pang kahalitan sa kalawasan nga wala gin-upod sang pulis sa upisyal nga awtopsiya sa pulis. Wala sang upisyal nga *death certificate* o permiso nga ginpaguwa sang anuman nga awtoridad nga dal-on na sang mga suldadong US ang iya bangkay sa Zamboanga City.

Sang Marso 3-4 naglunsar ang lain-lain nga grupo sang imbestigasyon sa pagkapatay ni Cardeño. Wala sila gintugutan nga inspeksyu-

non ang hulot kon sa diin nakit-an kuno ang bangkay sang biktima, wala man ginpakita ang teheras nga ginsiling gingamit niya sa paghikog.

Labi nga nagdaku ang pagsus-petsa kag kabalaka sang pamilya sang patyon si Maj. Javier Ignacio sang Marso 25 sa Zamboanga City. Nakatakda siya nga magaatubang sa midya para ibuyagyag ang malahalon nga impormasyon bahin sa kaso.

Si Ignacio, hepe sang Military Police sang Western Mindanao Command, kag abyan sang pamilya Cardeno kag siya ang nagrekomenda sa biktima nga magtrabaho para sa mga tropang US bangud nga daku ang sweldo nga ginatanyag diri.

Nagbulig sadto si Ignacio sa imbestigasyon sang pagkamatay ni Cardeno sang siya naman ang patyon. Bag-o sini, ginsiling niya madamo ang nagtanyag sa iya sang suhol para maghipos na lang kag sang magdugay ginpaandaman na siya nga patyon kon indi siya mag-untat sa imbestigasyon.

Madamo na sang natukiban sa halambalanon sa misteryoso nga pagkapatay nanday Cardeno kag Javier. Una ang pagkainutil sang Visiting Forces (VFA) nga proteksyunan ang Pilipino nga biktima sang krimen sa kamot sang mga tropang US. Sa baylo, ginagamit pa ang VFA para takpan ang amo nga mga krimen kag palusuton ang mga kriminal nga suldado sang US.

Natukiban man sa kaso nga ini ang dalom kag lapad sang pagpahilabot-militar sang US sa Pilipinas. Ang Skylink, lokal nga *employment agency* nga nagpasulod kag Cardeno sa trabaho nga ginkontrata lang sang DynCorp. International, isa ka kumpanyang US nga nakakonsentra sa pagpangita sang mga kontraktwal nga empleyado para tungdan ang sensitibo nga trabaho para sa Pentagon kag US State Department.


Sang mapatay si Cardeno, nagu-guwa sa aktwal nga nakadestino siya sa Liaison Coordination Ele-

ments (LCE), isa ka yunit militar sang US nga ginalakipan sang mga elemento halin sa sanga sang *special operations* sang lain-lain nga serbisyo. Himuon sini ang pag-abiso kag pagbulig sa pili nga yunit sang AFP sa pagplano kag in-

tegrasyon sang tanan nga datos paniktik para suportahan ang mga operasyon batuk sa ginabilang nila nga mga grupong "terorista" o "insurhento." Sakup sang operasyon sang LCE ang armadong rebolusyonaryong kahublagan sa Pilipinas, ang Moro Islamic Liberation Front kag ang Abu Sayyaf.

Indi hungod nga mabuyagyag ang presensya sang yunit nga ini sa sulod sang isa ka kampo militar sang AFP sang mapatay si Cardeno. Indi man malayo nga ginpatay sanday Cardeno bangud sa mga nahibaluan nila nga mga likom kag mahigko nga hili-kuton nga himbunanay sang mga tropa sang US kag AFP.

Liwat ginpatingkad makangilidlis nga pagpatay kanday Cardeno ang importansya sang pagsulong sang mapagsik nga hublag masa batuk sa pagpasilabot-militar sang imperyalismong US sa Pilipinas kag agumon ang kinamatarung para sa biktima sang imperyalistang kalakasan. AB



Kumander sang US sa Afghanistan, ginpatalsik

GINPATALSIK ni Pres. Barack Obama sang US si Gen. Stanley McChrystal sa pwesto bilang kumander sang mga pwersang militar sang US kag NATO sa Afghanistan sining Hunyo 23.

Ang pagpatalsik kay General McChrystal nga gintuga sang mga pahayag niya kag sang iya mga kaupdanan sa interbyu sang magasin nga *Rolling Stone* nga indi paborable kay Obama.

Suno sa *Rolling Stone*, wala nalipay si McChrystal sa labing una niya nga pakipagsugilanon kay Obama sadtong isa ka tuig. Pila ka komento sang malapit nga tinawo sang heneral ang ginpublisar sang magasin kag wala nagustuhan sang administrasyon.

Sa ila mga pahayag, ginlaragway sang hubon ni General McChrystal ang kuno pagbanggianay sang militar kag sang mga ad-bayser ni Obama sa tion nga naga-ani sang madamo nga pagkunderang ang estratehiya sang Pentagon sa gera sa Afghanistan.

Ginbaylo sa iya si Gen. David Petraeus, ang kumander subong sang mga pwersang US sa Iraq. AB



Nagalala nga krisis sa European Union

Gulpe nga nagtibusok liwat ang baligyaanay sang mga sapi sa pangkalibutanon nga merkado sining Hulyo 2. Apat ka beses ini nga natabo halin nga maglupok ang krisis sa Greece duha ka bulan ang nagligad.

Pigado katama ang mga manugkapital nga malampuwasan ang krisis nga nagahanot sa bilog nga European Union (EU) nga nag-umpisa sa Greece sang Mayo. Bangud sa kahimtangan nga ginatiglawas sang ekonomya sang EU ang 30% sang kabilugan nga ekonomya sang kalibutan, ginakabalak-an nga pwede umpisahan ini sang bag-o nga paglala sang krisis sa pangkalibutanon nga sistemang kapitalista nga nag-umpisa sadtong 2007.

Una nga nagkabalaka ang bala-ligyaan sang mga sapi sa pangkalibutanong sakup kag nagtibusok ang baligyaanay sang mga sapi sang ginbuyagyang sa publiko sang bag-ong pungko nga presidente sang Greece sang Nobyembre 2009 ang madugay na nga nagapalala nga problema sang tuman nga pagdaku sang depisit sa badyet kag pangguwa nga utang sang gubyrno. Naglupok ang krisis pang-ekonomya sang pungsod sining Mayo sang napilitan na ang desperadong gubyrno sang Greece nga magpabulig sa EU kag International Monetary Fund (IMF).

Halin sang matukod ang 16 myembro nga Eurozone (mga pun-god nga komun nga nagagamit sang *euro* bilang kwarta) nagtakda na sila sang regulasyon nga dapat indi dapat magsobra sa 60% sang ila nga mga Gross Domestic Product (GDP o kabilugang produksyon sa sulod sang pungsod) ang ila nga mga utang kag indi maglampas sa 3% sang GDP

ang ila nga depisit sa badyet. Tuyo sini nga makontrol ang sobrang pagasto kag pagpangutang para masulhay kuno nga magpadayon ang pag-uswag sang ekonomya sang kada pungsod.

Luwas sa Finland kag Luxembourg, wala sang iban pang pungsod ang nakasunod sa regulasyon nga ini. Ang pungsod nga nagrekord sang pinakadaku nga tantos sa pagpangutang kon sa diin ang Greece naglab-ot sa 124.9% sang GDP. Ang depisit man sini 13.6% na sang GDP. Nagapangaduha lang ini sa Ireland nga amo ang may pinakadaku nga depisit sa badyet.

Halos tanan nga 27 pungsod nga sakup sang European Union may mabug-at nga problema sa nagatinaas nga depisit sa badyet kag daku nga pangguwa nga utang. Pareho sang Greece, ang pila pa ka pungsod sa sakup sa EU wala sang ikasarang magbayad sang pangguwa nga utang kag wala man sa pusisyon nga liwat mangutang. Kasunod sang Greece, ang Italy ang may pinakamataas ang tantos sa utang nga 118.2% sang GDP. Ang iban pa amo ang Portugal, 85.6%; Germany 78.8%; kag Ireland, 77.3%. Ang depisit sa badyet sang gubyrno sang Ireland naglab-ot na sa 14.7%; United Kingdom, 10.4%; Spain, 10.1%; Latvia, 9.9%; kag Portugal, 8%.

Isa ka rason kon ngaa sobra nga ginakabalak-an ang pagbagsak sang ekonomya sang Greece amo ang peligro nga magdeklarar ini sang pagkabangkras kag hungod nga in-

di magbayad sang mga utang sini. Pat-ud nga magtuga ini sang daku nga pagkaputo sa mga bangko sa Germany, United Kingdom, France, Japan kag US bangud 80% sang utang pangguwa sang Greece naghalin sa mga pungsod nga ini.

Para matapna ang krisis sa Greece, malikawan nga maglapnag ini sa iban pang pungsod sang EU kag sa bilog nga kalibutan, nag-isa ang EU kag IMF sang Mayo nga salbaron ini paagi sang pagpautang sang 45 bilyong *euro* (\$54.2 bilyon) sa umpisa asta 110 bilyong *euro* (\$1.322 trilyon) kon kinahanglanon pa. Nakakundisyon ini sa pagpatuman sang Greece sang mga tikang sa pagkinot, pagbuhin, pagpabilin sang sweldo sang empleyado sang gubyrno, pagsapsap sa mga pensyon kag pagbuhin sa mga benepisyos para sa mga bata.

Ang mga kundisyon nagtuga sang grabeng kaakig sa pumuluyo sang Greece nga nangin mitsa sang pungsodnon nga welga nga ginpasakupan sang 50,000 ka mamumugon sang Mayo 4-5.

Bangud sa pagluntad sang pareho nga sitwasyon sa madamu nga pungsod sa EU, nagdesisyon ang EU kag IMF sang Mayo 10 nga magtigana sang 750 bilyong *euro* o halos \$1 trilyon nga pondo bilang ayuda sa mga pungsod sang EU nga nagakinahanglan sang gilayon nga bulig. Kabaylo sini, ginaobligar ang kada gubyrno nga magpanaog sang mga tikang sa pagkinot, pareho sa Greece para kuno malikawan nga magpareho diri. Ginaduso man sang EU kag IMF ang pagdugang sang mga buwis.

Ginkaakig sang obreros kag ila pamilya ang grabe nga hanot sang mga polisiya sa hugot nga pagkinot sang mga gubyrno sa sakop sang EU bangud nagadingot ini sa ila sang kinamatarung sa sandigan nga benepisyos kag serbisyo pangkatilingan.

AB



EU, ginabayo sang mabaskog nga hublag protesta

Nagalapnag ang mga aksyon protesta sang mga mamumugon sa mga pungsod nga sakup sang European Union (EU) bangud sa grabeng pagpamatuk sa hugot nga mga tikang nga pagkinot nga tuyo ipatuman sa mga pungsod nga ini.

Ginapanan-aw sang mga mamumugon nga ang natumod nga mga tikang nga magtuga sa sobra nga kabudlayan.


Magakahulugan ang mga ini sang daku nga buhin sa badyet para sa basehang benepisyo kag serbi-syong sosyal pareho sang pensyon, edukasyon, ikaayong lawas, suporta sa mga bata, pabalay kag iban pa. Siling nila, "kami ang direktang nagapas-an sa bug-at sang higanteng pautang nga indi naman kami makabenepisyo kag kami ang ginsilutan sa bug-at sang krisis nga indi man kami ang may kasaypanan."

Hunyo 29. Nagmartsa ang 12,000 raliyista sa syudad sang Athens sa Greece kag nagrali sa atubang sang talatapan sa parlamento kon sa diin ginadebatihan sang mga diputado ang pagbuhin sa pensyon nga ginadikta sang EU kag IMF bilang kabahin sang programa sa hugot nga pagkinot sang gubyrno. Ginapamatukan nila ang tuyo sang gubyrno nga buhinan ang ila pensyon kag pataason ang ila edad sang pagretiro. Nagbunga ang martsa-rali sang dislokasyon sa industriya sang turismo kag pangpubliko nga transportasyon.

Ikalima nga mayor nga welga ining ginlunsar sang mga unyon sang mamumugon sa pangpubliko kag pribadong sektor sang Greece halin sang Mayo. Nagpaandam ang unyon nga maglunsar sang 24 oras welga subong nga Hulyo angut sang planong pagbuhin sang pensyon. Antes sini 50,000 mamumu-

gon ang naglunsar sang 2-adlaw nga pangkabilugang welga sang Mayo 4-5. Ginsundan ini sang martsa-rali sang Mayo 20 sa syudad sang Athens kag sang mga hublag-protesta sang Hunyo 5 kag 23 nga ginpamunuan sang komunistang grupo.

Hunyo 29. Naglunsar man sang welga ang mga mamumugon sang Spain nga nagparalisa sa bilog nga sistema sang transportasyon sa mga syudad. Ginkaakig sang mga nagwelga ang tikang sang gubyrno nga buhinan sang 5% ang sweldo sang mga mamumugon sa pangpublikong sektor. Sadtong Mayo 27 nagdaog sang isa ka boto sa parlamento ang mga tikang sa pagkinot. Bag-o sini naglunsar na ang mga mamumugon sang isa ka adlaw nga welga sadtong Hunyo 8 nga ginpartisipahan sang 75% sang 2.3 milyon nga myembro sang duha ka pinaka-



daku nga unyon sa pangpublikong sektor sang Spain.

Hunyo 25. Naglunsar sang martsa rali ang obreros sa mga syudad sang Rome, Milan kag iban pa sa Italy para igiit sa gubyrno nga bawion ang 25 bilyong *euro* (\$30.1 bilyon) nga buhin sa badyet. Ginbuylugan ini sang mga myembro ang CIGL, pinakadaku nga unyon sa Italy nga may anom ka milyong myembro. Nagpaandam ang mga raliyista nga liwat maglunsar sang hublag protesta sa Septyembre 29 kon indi sabton sang gubyrno ang ila mga ginahingyo.

Hunyo 24. Sa France duha ka milyong mamumugon ang naglunsar sang 200 hublag-protesta sa lain-lain nga lugar sa pungsod sang Hunyo 24. Ginapamatukan nila ang tikang sang gubyrno nga itaas ang edad sang pagretiro halin 60 asta 62 anyos. Ginpamunuan ang nasambit nga hublag-protesta sang CGT, pinakadaku nga unyon sa France.

Hunyo 12. Sa Germany, linibo ka obreros ang nagprotesta batuk sa tikang sang gubyrno nga buhinan ang badyet sang 80 bilyong *euro* (\$96.30 bilyon). Ini ang pinakadaku nga buhin sang gubyrno sa badyet halin sang Ikaduhang Gera Pangkalibutanon. Ginpamatukan nila ang dugang nga buwis nga ipapanaog sa sulod sang apat ka tuig halin 2010.

Mayo 27. Sa Portugal, linibo nga mamumugon ang nagmartsa sa syudad sang Lisbon para batuan ang mga tikang nga pagkinot sang gubyrno, kon sa diin tampok ang pagbuhin sang 5% sa kita sang mga empleyado sa pangpublikong sektor. Ang nasambit nga rali ang pinakauna nga hublag protesta sa pungsod halin sang aprubahan sang Mayo 13 ang mga tikang sa pagkinot sa mga sandigan nga benipisyo kag serbisyo nga pangkati-lingban. AB

50,000 mamumugon, nagwelga sa Bangladesh

Masobra 50,000 mamumugon sa mga pabrika sang bayu sa Dhaka, kapital sang Bangladesh ang sunud-sunod nga nagwelga halin Hunyo 19 asta 22 para iduso ang pagtaas sa ila nga sweldo. Mapintas nga ginbungkag sang mga pulis ang nasambit nga welga.

Gindemanda sang obreros nga ipatuman ang pagtaas sang bualan nga minimum nga sweldo halin 1,662 *taka* (halos \$24.00 o Ph 1,145.00) pakadto sa 5,000 *taka* (\$71.00 o Ph3,270.00) suno sa nakasugtanan sang ila mga unyon, gubyrno kag tag-iya sang mga pabrika sadto pa nga 2006.

Sang Hunyo 19, nagguwa sila sa mga pabrika, nagpiket kag nagbarikada sa mga dalan pakadto sa sona sang pagmanupaktura sa Ashulia kag Kanchpur, 30 kilometros ang kalayuon sa naaminhang bahin sang Dhaka. Sa duha ka sona nga ini makit-an ang mga pabrika nga nagasuplay sang bayu para sa mga

daku nga dumuluong nga kumpanya pareho sang Wal-Mart, Tesco, Zara, Carefour kag H&M.

Gintuyo sang mga pulis nga bungkagon ang ila barikada, ginbomba sang tubig ang mga welgista, ginpalukpan sang tirgas. Nagbalos ang mga welgista paagi sang paghaboy sang mga bato sa mga pulis. Sa dako nga kaakig nila, ginguba nila ang 200 pabrika. Masobra 100 welgista ang napilasan.

Paglab-ot sang Hunyo 22, naggrabe ang kaakig sang mga welgista sang magdesisyon ang Bangladesh Garments Manufacturers and Exporters' Association (BGMEA) nga isara sang wala sang pat-ud

ang 250 pabrika. Liwat sila nga nagpiket sa mga dalanon, nagsunog sang mga goma kag salakyan nga nagapamilit nga mag-agi.

Ang industriya sang tela kag bayu ang pinakadaku (80%) eksporter sang Bangladesh kag nagakita sang \$15 bilyon kada tuig.

Angut sini, ginlunsar man sang Hunyo 27 ang pinakauna nga pangkabilugang welga sa Dhaka, sa pagpamuno sang oposisyon nga Bangladesh National Party (BNP). Ginkundena ang mga kapaslawan kag pagpang-abuso sang administrasyon ni Prime Minister Sheikh Hasina Wazed halin sang magpungko ini sang 2009. Ginaduso nila ang paghiwat sang temprano nga eleksyon antes mag-2013. Patimaan sang suporta sang pumuluyo para sa welga, paralisado sang isa ka adlaw ang bilog nga pungsod. Wala sang nagbyahe nga pangpubliko nga salakyan kag sarado ang tanan nga negosyo. **AB**

Protesta sa sinapol sang G8 kag G20

Ginsugata ang isa ka simana nga protesta ang tatlo ka adlaw nga sinapol sang Group of 8 (G8) kag Group of 20 (G20) sang Hunyo 25 asta 27 sa Ontario, Canada. Ang G8 kag G20 ang hubon sang pinakamanggaranon nga pungsod sa bilog nga kalibutan. Topiko sang sinapol ang paglampuwas sa pangkalibutanon nga krisis sa pinansya kag ang krisis nga nagatay-og su-bong sa Europe kontra sa nagadaku nga deposit kag utang sang gubyrno.

Ginpakamalaut sang mga nagprotesta ang wala sang pulos sang nasambit nga pulong nga gingastuhan sang masobra isa ka bilyong dolyar halin sa buwis sang pumuluyo sa Canada. Ginkastigo nila ang mga polisiya sini pareho sang mga tikang sa pagkinot kag mga benepisyos para sa mga mamumugon kag pumuluyo kag serbisyo sosyal.


Masobra 10,000 aktibista halin sa nagkalain-lain nga grupo nga nagabato sa globalisasyon ang nagmartsa sang Hunyo 26 sa Toronto, pinakadaku nga syudad sang Cana-

da. Ang nasambit nga martsa kasugpon kag nagaserbi nga putuk-putukan sang lain-lain nga porma sang gagmay nga aksyong protesta. Isa ka adlaw nga naparalisa ang transportasyon kag nagsara ang mga ospital kag iban pa sa Toronto.

Ang martsa nagumpisa sa rali nga ginlunsar sa atubang sang Parlamento sang Ontario. Duha ka kilometros pa lang ang kalayuon sang martsa sa Metro Toronto Convention Center, kon sa diin ginahiwat ang pulong, ginbalabagan na ini kag ginsulong sang mga *riot*

police. Isa ka grupo ang nagbato sa mga pulis gamit ang mga bato, botelya, kag iban pa nga matig-a nga bagay. Nagbalos naman ang mga pulis paagi sang tirgas, *smoke grenade* kag *rubber bullets*. Ginsundan ini sang paghaluglog sa mga gamit kag pagpanakit. Masobra 400 raliyista ang ginaresto.

Masunod nga adlaw, ginreyd sang mga pulis ang unibersidad nga ginateneran sang mga aktibista. Nagaabot sa 200 ang ginaresto kag ginpreso sang mga pulis, apat kilometros ang kalayuon sa ginamitingan. Wala magdugay, naglunsar sang rali ang mga aktibista sa atubang sa nasambit nga presohan para pagguwaon ang iban pa nga detenido. Makahas nga ginbungkag sang mga indi-unipormadong pulis ang rali kag ginkulong ang mga ginaspetsahan nga lider. **AB**

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XLI No.13
Hunyo 7, 2010
www.philippinerevolution.net

Editorial

Noynoy Aquino: Ang bag-o nga itsura sang kontra-rebolusyon

Si Benigno “Noynoy” Aquino III ang bag-o nga itsura sang kontra-rebolusyon. Pormal na siya nga ginpwesto sang Hunyo 30 bilang bag-o nga puno sang papet nga reaksyunaryong gubyrno. Siya na subong ang pangunahon nga tagasakdag sang paghari sang imperyalismong US, kag lokal nga daku nga burgesyang kumprador, burukrata kapitalista kag agalon nga mayduta.

Sa iya subong nakasalig ang mayor nga responsibilidad nga padayunon ang pagdumala sa garuk kag bangkrap nga malakolonyal kag malapyudal nga sistema, palig-unon kag padalagnon ang estado sini, kag tapnaon ang anuman nga hangkat sa papet nga reaksyunaryong gahum.

Pareho sang ginalauman sa iya sang imperyalismong US kag mga lokal nga nagaharing sahi, ginsentro ni Aquino ang iya una nga inadlaw sa pagkonsolida sang papet nga hangaway. Nahibal-an ni Aquino nga ang Armed Forces of the Philippines (AFP) ang mayor nga sandigan sang reaksyunaryong paghari sa Pilipinas. Ini ang magaserbi nga mayor nga instrumento niya sa pag-uyat sa gahum kag pagpatuman sang mga hilikuton. Amo gani

nga todo ang pagsuporta niya diri: promisa sang dugang nga tinawo, bag-ong kagamitan, pabalay para sa mga suldado kag iban pa.

Wala niya ginkastigo ang AFP sa daku nga krimen sini sa pumuluyo. Sa sini, ginapabatyag ni Aquino ang pagsuporta niya sa malaut nga pasistang kampanya sang pagtapna sang AFP nga nagbunga sa linibo nga kaso sang paglapas sa tawhanong kinamatarung. Hayagan niya nga ginbalewala ang reklamo sang pila ka

pulo ka libo nga biktima sang kalakasan militar kag mga tagasakdag sang tawhanong kinamatarung. Wala gani siya nangako nga may matarung nga pagsukot sa tuman kadamu nga

pasistang krimen sa idalom sang nagligad nga rehimen kag pagsilut sa mga may utok sini nga upisyal sang papet nga militar kag pwersa pangseguridad.

Samtang todo-todo ang paglangis niya sa AFP, wala ni isa ka atensyon nga ginahatag si Aquino sa mga basehang problema sang banwa kag sa ila mga demanda para sa hustisya sosyal. Ang mga una nga adlaw niya sa poder ginsentro sa pagpasikat sang gindumili niya ang paggamit sang “wangwang” (sirena) sa karsada agud pagguwaon siya naga isa sa pumuluyo batuk sa pagpangabuso sang mga poderoso.

Indi kuno siya bungol sa mga reklamo sang pumu-



***Mga tampok sa
isyu nga ini...***

**Seryoso bala si
Aquino sa sugilanon
pangkalinungan?**

PAHINA 5

**Bayan Muna
coordinator, ginpatay**
PAHINA 7

**Krisis sa European
Union, nagalala**

PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Dinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com